

大理張氏詩文存遺

大理張氏詩文
存遺

張燦亭藏

大理張氏詩文存遺序

吾家大理之喜洲。經丙辰杜文秀之亂。自先祖靜山公以上歷代傳留之遺墨。蕩然無存。厥後諸伯叔散處四方。幾經喪亂。先祖遺墨之僅存者。又散佚大半。諸伯叔所自著作。亦多就漸滅。其展轉歸余手者。不及十之一。雖吉光片羽。常自珍護。而斷簡零篇。終難流傳。蓋德光之幽閔久矣。比滇省有集刻先賢詩文之舉。主事諸君子搜討甚勤。徵詢屢及吾家。爰就所藏先人遺墨。恭錄先祖靜山公文十五篇。詩二篇。先二伯菊畦公詩三首。先七伯蔚森公詩三十七首。先君勵吾公詩四首。先母陸太夫人詩二十三首。先堂兄迪臣詩二十五首。彙編成冊。備采擇焉。錄既竟。族

人聞知紛索副本。戚友亦快先睹。鈔胥不能遍應。遂以付之排印。題曰大理張氏詩文存遺。實非遺稿全部也。

民國紀元二十四年清明張耀曾謹誌於春申江上之寓廬

大理張氏詩文存遺目錄

卷一

先祖靜山公文十五篇

又詩二篇

卷二

先二伯菊畦公詩二首

先七伯蔚森公詩三十七首

卷三

先君勵吾公詩四首

先母陸太夫人詩二十三首

卷四

先堂兄迪臣公詩二十五首

大理張氏詩文存遺卷一

蓉溪張耀曾輯存

先祖靜山公諱其仁。清道光乙酉科經魁。丙戌科進士。授四川蓬溪縣知縣。調補江津縣知縣。經川督密保召見。簡授合州知州。安徽徽州鳳陽等府知府。湖南分巡衡永郴桂兵備道。署湖南通省糧儲道。生平勤政撫民。不暇吟咏。惟凡述德紀功。或旌善勸學。必自屬稿。所爲關係世道之文。不下數百篇。今存宰蜀時遺文二十餘篇。謹擇錄十五篇及詩歌二首於左。尙有銘心齋臆說萬餘言。晰論修身施治之道。精刻謹嚴。另刊專冊。

給耆民積善餘慶四字扁額序

積善之家必有餘慶。斯言也。塾師里老能言之。愚夫愚婦亦將傳聞而樂道之。及進而詰其所由入善之門。智者創焉。愚者惑焉。其能立餘慶之基者鮮矣。邑之耆民周氏子名世耀者。行年七十。不策鳩。不祝嘏。子一孫三。聚慶一堂。其族隣紳耆。以其康強逢吉爲積善之報。請額於予。以表彰閭里。予訪其積善之實跡。僉曰。若無他。力持勤儉而已。富哉言乎。可知所由入善之門。與所以立餘慶之基矣。夫人之稱善者。必將舉孝弟忠信禮義廉恥而克備乃躬。可以善身。可以善世。顧世之淫心舍力奢華浮靡者。逸則忘善。侈則縱慾。是終入善無門。遑問其於孝弟忠信禮義廉恥爲何如乎。又何餘慶之有乎。勤能精業。儉不奪人。

周氏子之於孝弟忠信禮義廉恥。吾知其必有合矣。準此而積善。積善而必有餘慶矣。若夫廟宇堰堤之鳩工。克勝其任。特勤儉者之餘事。而積善者不以是靳也。予宰斯邑四載於茲。常欲斯民日遷於善。而慶天庥之沛至。予慮其不知所由入善之門。卽無由立餘慶之基也。因卽邑之力持勤儉者。以發明之。

增修鰲峙堰序

從來潤萬物者。莫潤乎水。周禮詳水利。則以濬濬水。以防止水。蓋相其地之宜。權夫水之勢。而盡乎潤之用。邑之附郭有溪。自東而北而西。層疊駛流。其勢瀉甚。嘉慶四年北平李心湖前輩來宰斯邑。於溪之下流築堰。曰鰲峙。而水以停滯。蓋得乎潤之義矣。第秋

冬時。惟堰前丈許。積水頗深。其自下上上。或尺焉。或不及尺焉。則尙未盡乎潤之用也。且夫渠之有水。猶人之有血脈。血不枯而後膚革豐盈。水不涸而後氣勢滂渤。矧斯水右帶聖宮。左環城郭。其有係於闔邑之豐悴榮枯者。正復不少。宰斯邑者。畜衆容民。有如此水。顧茲環溪。能勿加之意乎。是歲癸巳。政暇民和。爰合衆議。仍舊堰而增高繼長。余捐廉爲之倡。諸僚佐爲之贊成。而士民之踴躍急公者。不啻歸如流水焉。是役也。工始於某月某日。竣於某月某日。真所謂不日成之者。繼自今。泓然潯然已。迥殊於鬪的。爲潛爲澍。亦不等於蹄涔。蓋水則猶是也。而潤過之矣。由是而拜爵授糈。則土潤。陳粟朽貫。則農潤。典制五材。

利市三倍。則工與商皆潤。卽余與諸僚佐覩闔境滋潤之象。行將心廣體胖。而獲潤身之休。又豈徒潤色昇平已哉。雖然。磐石鞏固有形之保障也。禮教彰明無形之隄防也。人無於水監。當於民監。如謂存滿溢之思。而自詡澤潤生民。則吾豈敢。

代擬同寅輓文

恭輓皇清恩賜耆賓正八品頂戴。贈奉政大夫國選張太封翁大人仙馭。

聞滇西矗矗十九峯競秀。如碧玉城。英奇特達之士多出其間。地靈而人傑也。若夫得氣之深厚悠久。生而無憂。終其身以自然還造化。惟我太封翁國選先生大人。殆間氣獨靈者歟。先生先世籍隸江南鳳陽。

府家傳孝友。世美書香。始祖諱建成。元時官滇之通海路古橋州刺史。遂卜居葉榆。後乃昌大。傳一十三代。不絕黃卷青衿。其間如五峯廉訪。桂城參議。峻望清操。至今稱頌。先生一布衣士。獨能涵葆性真。培養累代簪紱英華。俾淳澆勿洩。蓋從來有機事者必有機心。彼其聰明才辯。口誦百家之言。目窮千里之視。胸注萬變之慮。多近於杞人憂天。憂則鑿。鑿則安所得不死之混沌。相與終古。如我先生者乎。先生素康強。雖耄耋不策鳩。朝廷典重耆賓。恩賚及焉。蓋先生性泊然無營。終其身不失赤子之心。處父子夫婦昆弟朋友之間。純一無僞。讀書不求甚解。入世不圖聞達。靜則寢息義農。動則興居懷葛。每終日危坐。得意

忘言。得言忘象。時或徜徉於四洲三島九曲之勝。而一無所繫累。無極而太極。仍以太極還無極。渾渾爾。噩噩爾。雖皇古太初之淳風。於茲見之可也。雖然。先生之爲人不可及。而先生之遇尤不可期也。先太老封翁自超先生。以青衿承世澤。陰行善事。肯構肯堂。先生爲之子。克享其成。先生雁行居長。叔季多賢。原配楊太老孺人早喪。續配趙太老孺人。潔脩以主中饋。如賓如友。嗣君鏡堂先生。孝敬慈惠。恭儉禮讓。善繼善述。弱冠青衿。代先生而理家政。相與德配先趙太孺人。今王太孺人侍奉維謹。凡自溫清定省。以致衾櫛塗塗。曲盡敬誠。而又能推廣義方之教。冢孫靜山大尹。以英年得魁鄉薦。捷南宮。出宰巴蜀。歷治三

邑卓著循聲。次孫仲山茂才。亦以青年冠軍食餽。行將騰達蜚黃。點額堂中。又有滿目雲初。所謂孫復生孫。崢嶸頭角儼然荀氏之龍。蓋綜先生之生平。父作之。子述之。而孫成之。無憂者其惟先生乎。然觀先生之少而壯。壯而老。爲富貴。爲壽考。爲令終。極五福三多之全。先生仍無所容心於其間。是先生之遇天成之。仍皆先生厚德載之也。先生其可及耶。先生享年八十有五。談笑而逝。老人星降生人寰。逍遙神仙歲月。今已乘鶴飄然去矣。某等與令冢孫同舟西蜀。目未睹先生之容。耳食先生之聲。心儀先生之德。嗚呼雲山隱隱。古道猶存。南望出涕。作爲此言。其詞曰。

巍巍雲峨簇雪兮。玉削奇離。安得珍符苞祕兮。胎胚

農義允先生其敦噩兮。皇錫之嘽。混沌罔剖兮。餐寐
由由。厥朕始水木兮。自揚徂梁。衍盍簪以綿朕兮。宏
我鳳陽。方百卉之競秀兮。適萬端之流激。洎先生其
善藏兮。韋素恬謚。俾菁英其聚華兮。瀟流澤以無溢。
彼管蠡癘作慧兮。東野憂天。艾夷昧草兮。皇古斯捐。
迺先生躑躅太初兮。坦時側反。無懷偕攜兮。葛天仰
偃。升木以其猿狖兮。瞰室以其夔魑。獨從松與僑兮。
忘我太虛。哽祝靡事兮。刻鳩無居。屏申椒與困桂兮。
羞以爲糈。太極無極兮。亘古希夷。忘言忘象兮。有爲
無爲。矧前迪箕裘兮。後招萊舞。繩我堂構兮。妥我先
宇。有子克家兮。綢繆牖戶。齊踞旦以省晨兮。怡肥胖
以清醑。青衿曳以庭侍兮。授燕竇之義方。睇孫枝如

珠與玉兮。伯仲駢光。策重閼之駟兮。承適館之筐。沛
湛恩資耄耄兮。俾壽俾康。旋花褒叩綸綍兮。爾熾爾
昌。燦雪初其紉縵兮。指額點紱與紳。鳳翩翩其羽兮。
麟有角而振振。泊髻垂逮幡勝兮。帝相乃身。倏帡雲
其駕鶴兮。青鳥施聞。感大造之豐祚兮。夫何慘於氤
氲。維元孫怛怛以中惻兮。鼓蜀僚之殷殷。翹南中而
奠聲兮。表寸於文。嗚呼。哲人茲謝兮。蒼蒼山雲。

祭枯柏渡文

道光十二年正月十日。署昭化縣知縣張其仁。率
僚屬具牲帛。虔禱於江濱尊神之前曰。伏維歷朝典
祀。首重澤施於民。四瀆有靈。豈能非鬼而祭。夫長江
發源濫觴。而利通舟楫。四方之行旅賴之。郭景純謂

水德靈長。良非虛語。聖天子先勤民而後致力於神。每歲春秋欽頒祀典。凡有司牧之責者。以時享祀。江瀆之神。示勤民也。昭邑濱臨長江。爲水陸通衢。其在桔柏渡而上。上而溯之峴崙之墟。不知其幾千萬里矣。其在桔柏渡而下。下而至於入海之區。又不知其幾千萬里矣。自神禹功施決排。而江水泱泱。其復能厲哉。乃無何。而一葉往還。勢成狎玩。風起水湧。災生意外。卽如桔柏渡一帶。三水會流。上通平武。下達蒼溪南部。險灘急浪。無冬無夏。以爲民害。計自辛卯二月奉札來署斯邑。一載以來。據民間報稱淹斃之案。不下十數起。夫昭化特彈丸小邑耳。昭化之濱依長江亦不過數百里耳。而縣令終歲之案。牘淹斃